



Կարգապահական գործ թիվ ԿԳ-25071

Հայաստանի Հանրապետության փաստաբանների պալատի
կարգապահական հանձնաժողովի

Ո Ր Ո Շ ՈՒ Մ

**ՓԱՍՏԱՐԱՆ ԼԻԴԱ ԳԱԳԻԿԻ ՀԱԿՈՐՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ**

Հայաստանի Հանրապետության փաստաբանների պալատի կարգապահական հանձնաժողովը (**այսուհետև նաև՝ Հանձնաժողով**), Հանձնաժողովի նախագահ՝ Տաթևիկ Շալջյանի, Հանձնաժողովի գեկուցող անդամ՝ Կարինե Բաղդասարյանի, Հանձնաժողովի անդամներ՝ Միքայել Դանիելյանի, Գուրգեն Թորոսյանի և Կարեն Խալաթյանի կազմով,

քարտուղարությամբ՝ Մերի Տերտերյանի,

մասնակցությամբ՝ Արմինե Հովհաննիսյանի և փաստաբան Լիդա Հակոբյանի,

քննության առնելով փաստաբան Լիդա Գագիկի Հակոբյանին (**այսուհետև նաև՝ Փաստաբան կամ Պատասխանող**) (արտոնագիր՝ թիվ 1038) կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Արմինե Հովհաննիսյանը (**այսուհետև՝ Դիմող**), դիմելով Պալատ, հայտնել է, որ փաստաբան Լիդա Հակոբյանը թիվ ԵԴ2/2193/02/25 քաղաքացիական գործով հանդիսանում է հայցվոր կողմի ներկայացուցիչը, իսկ Դիմողը հանդիսանում է պատասխանող կողմի ներկայացուցիչը:

Փաստաբանը, որպես հայցվորի ներկայացուցիչ, առանց Դիմողին տեղեկացնելու, զանգահարել է նշված քաղաքացիական գործով իր վստահորդ Ծաղիկ Գրիգորյանին: Վերջինս պատասխանել է, որ ունի փաստաբան, առաջարկել է հարցերի դեպքում դիմել վերջինիս, սակայն, Լիդա Հակոբյանը շարունակել է խոսակցությունը և առաջարկել բացել վեճի առարկա հանդիսացող բնակարանի դուռը: Խոսակցության ընթացքում Փաստաբանը խոսել է բարձր տոնով, անհարգալից, որի արդյունքում իր վստահորդը հայտնվել է խիստ հուզական վիճակում: Հեռախոսազրույցի ավարտից հետո, Ծաղիկ Գրիգորյանը փորձել է զանգահարել իր դստերը, սակայն սխալմամբ զանգահարել է Լիդա Հակոբյանին, ով պատասխանել է հեռախոսազանգին և չի տեղեկացրել, որ

**Թիվ ԿԳ-25071-2-Ա
27.08.2025թ.**



Ծաղիկ Գրիգորյանին իրեն է զանգահարել, ոչ թե իր դատերը, լուռ լսել է խոսակցությունը և ձայնագրել: Հետագայում այդ երկու հեռախոսային խոսակցությունների ձայնագրությունները ներկայացրել է դատարան:

Դիմումին կից ներկայացվել են ձայնագրություններ և փաստաթղթեր:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 05.06.2025 թվականին Դիմողին առաջարկվել է գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Դիմողը 03.07.2025թ. գրությամբ ներկայացրել է «cabinet.armlex.am» էլեկտրոնային քաղաքացիական դատավարության կայքէջից արտատպված նյութեր՝ թիվ ԵԴ2/2193/02/25 քաղաքացիական գործով Փաստաբանի վստահորդի անունից ներկայացված միջնորդության պատճենը, գրությունների պատճենները, ինչպես նաև Փաստաբանի և Դիմողի վստահորդ Ծաղիկ Գրիգորյանի միջև հեռախոսագրույցի ձայնագրությունը:

Հանձնաժողովի նիստի ընթացքում Դիմողն ըստ էության պնդել է նախկինում ներկայացված դիրքորոշումը:

2. Պատասխանողի համառոտ բացատրությունները.

Մինչև կարգապահական վարույթ հարուցելու հարցի լուծումը փաստաբան Լիդա Հակոբյանին առաջարկվել է ներկայացնել բացատրություն Արմինե Հովհաննիսյանի դիմումի վերաբերյալ:

Փաստաբանը 21.05.2025թ. ներկայացրած բացատրությամբ հայտնել է, որ թիվ ԵԴ2/2193/02/25 քաղաքացիական գործի շրջանակներում ներկայացնում է հայցվոր Սյուզաննա Այվազյանի շահերը:

Դիմողի կողմից նշված ձայնագրությունը կատարվել է իր վստահորդի՝ Սյուզաննա Այվազյանի կողմից, երբ ինքը բարձրախոսով իր վստահորդի ներկայությամբ փորձել է Ծաղիկ Գրիգորյանի հետ առկա վեճը հաշտությամբ լուծել: Իր գործողություններն ուղղված են եղել ի շահ իր վստահորդի և ի շահ արդարադատության իրականացմանը:

Ինչ վերաբերում է հեռախոսային երկրորդ խոսակցությանը, ապա այն ձայնագրել է ինքը, սակայն դատարան ուղարկել է սխալմամբ, ինչի վերաբերյալ դատարան է ներկայացրել դիմում և միջնորդություն:

Փաստաբանը նշել է, որ իր վստահորդի պահանջով բազմիցս զանգահարել է Ծաղիկ Գրիգորյանին, և վերջինս որևէ գրավոր դիմում կամ պահանջ չի ներկայացրել, որ բանակցությունները վարվեն միայն իր փաստաբան Արմինե Հովհաննիսյանի ներկայությամբ:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 05.06.2025 թվականին Փաստաբանին առաջարկվել է գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Փաստաբանը 03.07.2025թ. ներկայացրել է հայցադիմում թիվ ԿԴ/5399/05/23 վարչական գործով:



Հանձնաժողովի նիստի ընթացքում Փաստաբանն ըստ էության պնդել է նախկինում ներկայացված դիրքորոշումը՝ հավելելով, որ մինչ այդ մի քանի անգամ կապ է հաստատել Ծաղիկ Գրիգորյանի հետ, սակայն իրավիճակը փոխվել է, երբ առաջացել է վեճ բնակարանի վերաբերյալ:

Փաստաբանը հավելել է նաև, որ ցանկացել է վեճը լուծել այնպես, որպեսզի չստեղծվի ավելորդ լարվածություն:

Փաստաբանը նշել է, որ չի տեղեկացրել Դիմողին նրա վստահորդի հետ շփումների մասին:

3. Կարգապահական վարույթ հարուցելու մասին որոշումը.

Պալատի նախագահի 27.05.2025թ. թիվ 164-Ա/ԿԳ-25071 որոշմամբ փաստաբան Լիդա Գագիկի Հակոբյանի նկատմամբ «Փաստաբանության մասին» օրենքի (**այսուհետ նաև՝ Օրենք**) 19-րդ հոդվածի 2-րդ կետի, ինչպես նաև Պալատի ընդհանուր ժողովի 2019 թվականի հոկտեմբերի 19-ի թիվ 1-Լ որոշմամբ հաստատված փաստաբանի վարքագծի կանոնագրքի (**այսուհետ նաև՝ Կանոնագիրք**) 5.3 ենթակետի խախտման հատկանիշներով հարուցվել է կարգապահական վարույթ:

02.06.2025թ. կարգապահական գործի նախապատրաստումը հանձնարարվել է Պալատի աշխատակազմի սպասարկող անձնակազմի աշխատակից Հայկ Ծատուրյանին (**այսուհետև նաև՝ Աշխատակից**):

3.1. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործ նախապատրաստող Աշխատակցի եզրակացությունը և գործի հանձնումը Հանձնաժողովին.

Գործի նախապատրաստման արդյունքում Աշխատակիցը 01.08.2025թ. կազմել է եզրակացություն:

Եզրակացությամբ հաստատված են համարվել սույն որոշման 5-րդ գլխի 1-2-րդ կետերում նշված փաստերը:

Հանձնաժողովի նիստը տեղի է ունեցել 27.08.2025թ. ժամը 18:30-ին ՀՀ փաստաբանների պալատի վարչական շենքում (ք.Երևան, Զաքյան 7-2, 4-րդ հարկ, թիվ 12 սենյակ):

5. Գործի հանգամանքները՝ առկա ապացույցների վկայակոչմամբ.

Հանձնաժողովը, ուսումնասիրելով գործում առկա ապացույցները, հաշվի առնելով նաև կարգապահական գործը նախապատրաստող աշխատակցի եզրակացությունը, հաստատված է համարում հետևյալ փաստերը.

1. Փաստաբան Լիդա Հակոբյանը հանդիսանում է թիվ ԵԴ2/2193/02/25 քաղաքացիական գործով հայցվոր Սյուզաննա Այվազյանի ներկայացուցիչը, իսկ Դիմող՝ փաստաբան Արմինե Հովհաննիսյանը՝ նույն գործով պատասխանող Ծաղիկ Գրիգորյանի ներկայացուցիչը: **Նշված փաստը հաստատվում է Դիմողի և Փաստաբանի բացատրություններով, ինչպես նաև թիվ ԵԴ2/2193/02/25 քաղաքացիական գործի վերաբերյալ դատալեքս դատական տեղեկատվական համակարգում առկա**



տեղեկություններով:

2. Փաստաբան Լիդա Հակոբյանը զանգահարել է Դիմող փաստաբան Արմինե Հովհաննիսյանի վստահորդ հիշյալ գործով պատասխանող Ծաղիկ Գրիգորյանին: **Նշված փաստը հաստատվում է Դիմողի և Փաստաբանի բացատրություններով:**

3. Փաստաբան Լիդա Հակոբյանը չի տեղեկացրել փաստաբան Արմինե Հովհաննիսյանին Ծաղիկ Գրիգորյանի հետո հետագա հաղորդակցությունների վերաբերյալ և այդ կապակցությամբ չի ստացել նրա համաձայնությունը: **Նշված փաստը հաստատվում է Հանձնաժողովի նիստի ընթացքում Փաստաբանի կողմից հայտնած դիրքորոշմամբ:**

4. Ծաղիկ Գրիգորյանի կողմից փաստաբան Լիդա Հակոբյանի՝ որպես գործով հակառակորդ կողմի ներկայացուցչի հետ շփում չի նախաձեռնվել: **Նշված փաստը հաստատվում է Հանձնաժողովի նիստի ընթացքում Փաստաբանի կողմից հայտնած դիրքորոշմամբ:**

5. Փաստաբան Լիդա Հակոբյանը չի նախազգուշացրել Ծաղիկ Գրիգորյանին հեռախոսազրույցից հետո հետագա քննարկումները Կանոնագրքի 5.3-րդ կետին համապատասխան իրականացնելու մասին: **Նշված փաստը հաստատվում է Հանձնաժողովի նիստի ընթացքում Փաստաբանի կողմից հայտնած դիրքորոշմամբ:**

6. Պատասխանողի անձը բնութագրող հանգամանքները.

Պալատի աշխատակազմի ղեկավարի կողմից տրված տեղեկանքի համաձայն՝ Լիդա Գագիկի Հակոբյանը փաստաբան է հանդիսանում 16.10.2010 թվականից, և 2020-2025թթ ընկած ժամանակահատվածում ունի 2 կարգապահական տույժ:

7. Պալատի Հանձնաժողովի պատճառաբանված եզրակացությունը և որոշումը.

Հանձնաժողովը գտնում է, որ փաստաբան Լիդա Գագիկի Հակոբյանն ենթակա է կարգապահական պատասխանատվության՝ Օրենքի 19-րդ հոդվածի 1-ին մասի 2-րդ կետի, ինչպես նաև Կանոնագրքի 5.3 ենթակետի խախտման համար՝ հետևյալ պատճառաբանությամբ.

Օրենքի 19-րդ հոդվածի 2-րդ կետի համաձայն՝ փաստաբանը պարտավոր է պահպանել նույն օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Օրենքի 39-րդ հոդվածի 1-ին մասի համաձայն՝ փաստաբանը ենթակա է կարգապահական պատասխանատվության սույն օրենքի և փաստաբանի վարքագծի կանոնագրքի պահանջները խախտելու համար, ... :

Օրենքի 39-րդ հոդվածի 2-րդ մասի համաձայն՝ Փաստաբանի նկատմամբ կարգապահական վարույթն իրականացվում է օրինականության, օրենքի և փաստաբանների պալատի առջև հավասարության, մրցակցության, կատարված կարգապահական խախտման համար նշանակվող կարգապահական տույժի համաչափության և անմեղության կանխավարկածի սկզբունքների հիման վրա:

Օրենքի 39.1-ին հոդվածի 1-ին մասի 1-ին և 2-րդ կետերի համաձայն՝ փաստաբանին կարգապահական պատասխանատվության ենթարկելու հիմքերն են՝ սույն օրենքի պահանջների խախտումը, որը կատարվել է դիտավորյալ կամ կուպի



անփութությամբ, ինչպես նաև փաստաբանի վարքագծի կանոնագրքի պահանջների խախտումը, որը կատարվել է դիտավորությամբ կամ կոպիտ անփութությամբ:

Օրենքի 39.1-ին հոդվածի 5-րդ մասի համաձայն՝ Փաստաբանը ենթակա չէ կարգապահական պատասխանատվության մեղքի բացակայության դեպքում:

Օրենքի 39.1-ին հոդվածի 6-րդ մասի համաձայն՝ կարգապահական խախտման համար փաստաբանը համարվում է անմեղ, քանի դեռ նրա մեղքն ապացուցված չէ սույն օրենքով սահմանված կարգով՝ Կարգապահական հանձնաժողովի՝ կարգապահական պատասխանատվության ենթարկելու մասին ուժի մեջ մտած որոշմամբ: Փաստաբանի կատարած կարգապահական խախտման վերաբերյալ չփարատված կասկածները մեկնաբանվում են փաստաբանի օգտին:

Օրենքի 1-ին մասի 1-ին կետի համաձայն՝ Փաստաբանների պալատի կարգապահական հանձնաժողովը կարծում է փաստաբանին կարգապահական պատասխանատվության ենթարկելու վերաբերյալ վարույթն այն դեպքում, երբ՝ առկա չէ կարգապահական պատասխանատվության ենթարկելու հիմք:

Ներկայացված նորմերի համադրության և վերլուծության արդյունքում կարելի է փաստել, որ Օրենքով սահմանված են որոշակի վավերապայմաններ, որոնց առկայության դեպքում միայն կարգապահական վարույթի շրջանակներում կարող է քննարկվել փաստաբանին կարգապահական պատասխանատվության ենթարկելու հարցը: Նշված վավերապայմաններն իրենց հերթին ենթադրում են փաստաբանի վարքագծում Օրենքի և Կանոնագրքի պահանջների խախտման առկայությունը, որը կատարվել է դիտավորությամբ կամ կոպիտ անփութությամբ:

Ընդ որում, նման վավերապայմանների ամրագրումն ինքնանպատակ չէ և ըստ էության նպատակաուղղված է կարգապահական վարույթի իրականացմանը՝ օրինականության, հավասարության, մրցակցության, համաչափության և անմեղության կանխավարկածի սկզբունքների հիման վրա:

Այս համատեքստում, կարգապահական վարույթի շրջանակներում առանձնակի նշանակություն է ձեռք բերում փաստաբանի վարքագծում համապատասխան խախտումների հատկանիշների առկայության ապացուցման հանգամանքը, ինչի անտեսումը կամ չապահովումը թույլ է տալիս եզրակացնել փաստաբանի վարքագծում առերևույթ խախտման հատկանիշների բացակայության մասին, քանի որ դրանք չեն հաստատվել վարույթի ընթացքում: Ըստ այդմ՝ յուրաքանչյուր կողմ պարտավոր է ապացուցել իր կողմից վկայակոչված հանգամանքները, կրում է դրանք ապացուցված չլինելու բացասական հանգամանքները, իսկ փաստաբանի կատարած կարգապահական խախտման վերաբերյալ չփարատված կասկածները մեկնաբանվում են վերջինիս օգտին:

Վերոնշյալի հաշվառմամբ, Հանձնաժողովը գտնում է, որ կարգապահական պատասխանատվության հիմք չի կարող լինել միայն ենթադրյալ իրավախախտման մասին դիմողի պնդումը, որը հիմնավորված չէ այնպիսի հանգամանքների վկայակոչմամբ և (կամ) ապացույցներով, որոնք հաստատապես կվկայեն փաստաբանի կողմից Օրենքի կամ Կանոնագրքի պահանջների խախտման կատարման մասին:

Տվյալ դեպքում, Դիմողն, ըստ էության, փաստաբան Լիդա Հակոբյանին վերագրում է հակառակ կողմի հետ շփման կանոնների խախտման վարքագիծը:



Վերոգրյալի համատեքստում, Հանձնաժողովը անհրաժեշտ է համարում անդրադառնալ, մասնավորապես, հետևյալ հարցին.

• **արդյո՞ք փաստաբան Լիդա Հակոբյանն անմիջական տեղեկություն է փոխանակել փաստաբան Արմինե Հովհաննիսյանի վստահորդ Ծաղիկ Գրիգորյանի՝ որպես գործով հակառակորդ կողմի հետ,**

• **արդյո՞ք փաստաբան Արմինե Հովհաննիսյանը տեղեկացված է եղել և տվել է իր համաձայնությունը, որպեսզի փաստաբան Լիդա Հակոբյանն անմիջական տեղեկություն փոխանակի իր վստահորդ Ծաղիկ Գրիգորյանի հետ,**

• **արդյո՞ք Ծաղիկ Գրիգորյանը՝ որպես հակառակորդ կողմ ինքն է նախաձեռնել շփումը փաստաբան Լիդա Հակոբյանի հետ,**

• **արդյո՞ք փաստաբան Լիդա Հակոբյանը նախազգուշացրել է հակառակորդ կողմին քննարկումները Կանոնագրքի 5.3-րդ կետին համապատասխան իրականացնելու վերաբերյալ:**

Համադրելով սույն կարգապահական գործի շրջանակներում Դիմողի և Փաստաբանի կողմից ներկայացված բացատրություններն ու ապացույցները մեջբերված նորմերի ու հիմնավորումների հետ, ինչպես նաև անդրադառնալով դրանց վերը ներկայացված հարցադրումների համատեքստում, Հանձնաժողովն արձանագրել է, որ փաստաբան Լիդա Հակոբյանը թիվ ԵԴ-2/2193/02/25 քաղաքացիական գործով հանդիսանում է հայցվոր կողմի ներկայացուցիչը, իսկ դիմող Արմինե Հովհաննիսյանը հանդիսանում է պատասխանող կողմի ներկայացուցիչը:

Փաստաբան Լիդա Հակոբյանը հեռախոսազանգի միջոցով քննարկում է իրականացրել նշված գործով որոշ հանգամանքների վերաբերյալ Դիմող փաստաբան Արմինե Հովհաննիսյանի վստահորդ Ծաղիկ Գրիգորյանի հետ և այդ կապակցությամբ չի տեղեկացրել Դիմողին և չի ստացել նրա համաձայնությունը:

Օրենքի 19-րդ հոդվածի 1-ին մասի 2-րդ կետի համաձայն՝ փաստաբանը պարտավոր է՝ ի թիվս այլնի պահպանել նույն օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Փաստաբանի վարքագծի կանոնագիրք 5.3 ենթակետի 1-ին պարբերության համաձայն՝ Փաստաբանը չպետք է որևէ դատական գործի կամ խնդրի հետ կապված անմիջական տեղեկություն փոխանակի հակառակորդ կողմի հետ, եթե այդ կողմին ներկայացնում է մեկ այլ փաստաբան՝ առանց այդ փաստաբանի համաձայնության (ավելին, վերջինս պետք է տեղեկացված լինի նման հաղորդակցության մասին), բացառությամբ այն դեպքի, երբ հակառակորդ կողմն ինքն է նախաձեռնել հանդիպումը կամ այդ գործընթացի ժամանակ հակառակորդ կողմի փաստաբանը ներկա չէ: Փաստաբանը պարտավոր է նույն կետում նշված կանոնի մասին նախազգուշացնել հակառակորդ կողմին և հետագա քննարկումները կազմակերպել նրա փաստաբանի ներկայությամբ:

Փաստաբանի մասնագիտական բարձր որակավորումը և իր պարտականությունների բարեխիղճ կատարումը փաստաբանության հաստատուի հանրային ընկալման առանցքային տարրերից են, որոնց բացակայությունն արժեզրկում է փաստաբանի՝ որպես իրավապաշտպան և արդարադատության կայացմանը նպաստող գործառույթներ իրականացնող անձի հասարակական նշանակությունը:



Վերոգրյալի հաշվառմամբ, փաստաբանի համար վստահորդի իրավունքների և շահերի բարեխղճորեն պաշտպանելու պարտականությունից բացի, փաստաբանի համար սահմանվում են նաև որոշակի պարտավորություններ և սահմանափակումներ: Ըստ այդմ, փաստաբանին արգելվում է որևէ շփում ունենալ հակառակորդ կողմի հետ, այն դեպքում, երբ վերջինիս իրավունքները և օրինական շահերը ներկայացնում է մեկ այլ փաստաբան՝ առանց այդ փաստաբանի համաձայնության:

Նշված կանոնից բացառություն է կազմում միայն այն իրավիճակը, երբ նման շփումը նախաձեռնում է հենց հակառակորդ կողմը, և այս դեպքում փաստաբանի նկատմամբ սահմանվում է պարտականություն՝ իրազեկել հակառակորդ կողմին Կանոնագրքի 5.3-րդ կետի պահանջների վերաբերյալ և հետագա քննարկումները կազմակերպել նրա փաստաբանի ներկայությամբ:

Համադրելով վերը ներկայացված նորմերը և հիմնավորումները գործի փաստական հանգամանքների հետ՝ Հանձնաժողովն արձանագրում է, որ Փաստաբանը, իր իսկ պնդման համաձայն, մինչև սույն գործով դիմումի ներկայացման հիմք հանդիսացող խոսակցությունը, մի քանի անգամ կապ է հաստատել հակառակորդ կողմ Ծաղիկ Գրիգորյանի հետ, ում շահերը ներկայացրել է Դիմողը:

Հանձնաժողովը հաստատված է համարում, որ թիվ ԵԴ2/2193/02/25 քաղաքացիական գործով Փաստաբանը, հանդիսանալով հայցվորի ներկայացուցիչը, տեղյակ է եղել, որ Դիմողը ներկայացնում է Ծաղիկ Գրիգորյանի շահերը, ուստի հակառակորդ կողմի հետ շփումները պարտավոր էր կազմակերպել Կանոնագրքի պահանջներին համապատասխան և չփոխանակել որևէ տեղեկատվություն նշված գործի վերաբերյալ:

Ըստ այդմ, նկատի ունենալով, որ սույն կարգապահական գործով քննարկման առարկա իրավիճակում հակառակորդ կողմ Ծաղիկ Գրիգորյանին զանգ կատարելու նախաձեռնությամբ հանդես է եկել հենց Փաստաբանը, Հանձնաժողովն արձանագրում է, որ Կանոնագրքի 5.3 ենթակետով սահմանված բացառության կիրառման հնարավորությունը բացակայում է, որպիսի պայմաններում բացառվում է նաև այնպիսի իրավիճակ, որի շրջանակներում Փաստաբանը կարող էր Ծաղիկ Գրիգորյանին տեղեկացնել քննարկումները վերջինիս փաստաբանի մասնակցությամբ իրականացնելու մասին:

Այսինքն, ստացվում է, որ Փաստաբանը կապ է հաստատել Ծաղիկ Գրիգորյանի հետ առանց Դիմող փաստաբան Արմինե Հովհաննիսյանի համաձայնության, ինչը կոնկրետ այս իրավիճակում պարտավոր էր ապահովել Փաստաբանը շփումները հակառակորդ կողմի հետ սահմանված կարգով կազմակերպելու համար:

Նման պայմաններում, Հանձնաժողովը, գնահատելով սույն կարգապահական գործի քննության ընթացքում ձեռք բերված նյութերը, ինչպես նաև Դիմողի և Փաստաբանի կողմից ներկայացրած բացատրությունները և ապացույցներն, իրենց ամբողջության մեջ, գտնում է, որ Փաստաբանի վարքագծում առկա են Օրենքի 19-րդ հոդվածի 1-ին մասի 2-րդ կետի, ինչպես նաև Կանոնագրքի 5.3 ենթակետի պահանջների խախտման հատկանիշները:



8. Կարգապահական տույժի ընտրությունը

Օրենքի 39.10 հոդվածի 1-ին մասի համաձայն՝ փաստաբանի կարգապահական պատասխանատվության հարցը քննելուց հետո փաստաբանների պալատի կարգապահական հանձնաժողովը կարող է փաստաբանի նկատմամբ կիրառել կարգապահական տույժերի հետևյալ տեսակներից մեկը, բացառությամբ սույն հոդվածի 3-րդ մասով նախատեսված դեպքի.

1) նկատողություն.

2) խիստ նկատողություն.

3) լրացուցիչ վերապատրաստման դասընթացներին մասնակցել.

4) տուգանք.

5) փաստաբանի արտոնագրի գործողության դադարեցում:

Օրենքի 39.10 հոդվածի 2-րդ մասի համաձայն՝ փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը: Կարգապահական տույժ կիրառելիս փաստաբանների պալատի կարգապահական հանձնաժողովը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Օրենքի 39.10 հոդվածի 3-րդ մասի համաձայն՝ Լրացուցիչ վերապատրաստման դասընթացներին մասնակցելու ժամաքանակը որոշում է փաստաբանների պալատի կարգապահական հանձնաժողովը: Լրացուցիչ վերապատրաստման դասընթացներին մասնակցելը կարող է կիրառվել նաև որպես լրացուցիչ տույժի միջոց սույն հոդվածի 1-ին մասի 1-ին, 2-րդ և 4-րդ կետերով նախատեսված տույժերից մեկի կիրառման հետ մեկտեղ:

Վերը նշված իրավական նորմերի համակարգային մեկնաբանության արդյունքում Հանձնաժողովը հանգում է այն եզրակացության, որ Պալատը հանդիսանում է փաստաբանների մասնագիտական, ինքնակառավարվող միավորում, որի խնդիրներից մեկը փաստաբանների իրավաչափ և փաստաբանի վարքագծի կանոններին համապատասխանող վարքագծի ապահովումն է, որը դրսևորվում է Հանձնաժողովի կողմից Օրենքով սահմանված կարգով փաստաբանին կարգապահական պատասխանատվության ենթարկելու գործառույթի իրականացման մեջ:

Օրենքով հստակ նախատեսված են կարգապահական պատասխանատվության միջոցների այն տեսակները, որոնք Հանձնաժողովն իրավասու է կիրառել կարգապահական փաստաբանների նկատմամբ: Ընդ որում, Օրենքում ամրագրված են փաստաբանի պատասխանատվության անհատականացման համար կիրառելի չափանիշներ:

Օրենքով Հանձնաժողովին վերապահված կարգապահական գործառույթից և այդ թվում փաստաբանի նկատմամբ կարգապահական վարույթ իրականացնելու և կարգապահական տույժ կիրառելու իրավագործությունից հետևում է, որ Հանձնաժողովը ոչ միայն իրավասու է, այլև պարտավոր է յուրաքանչյուր դեպքում իրականացնել փաստաբանի կողմից կատարված արարքի որակում Օրենքի և Կանոնագրքի շրջանակներում և դրան համապատասխան՝ նշանակել համապատասխան կարգապահական տույժ:

Համաչափության սկզբունքը



Մարդու իրավունքների եվրոպական դատարանը, խոսելով իրավունքների սահմանափակումների իրավաչափության մասին, առանձնացնում է հետևյալ հիմնական տարրերը՝ նպատակի իրավաչափություն, իրավաչափ նպատակի և այդ նպատակին հասնելու համար կիրառված միջոցների միջև համաչափության ողջամիտ հարաբերակցություն (Case of Khalfaoui v. France, 14.03.2000) :

Սույն պարագայում Պատասխանողին նշված կարգապահական տույժի ենթարկելու իրավաչափ նպատակն Օրենքի 7-րդ հոդվածի 2-րդ մասի 4-րդ կետով Պալատի վրա դրված խնդիր-պարտականության իրացումն է՝ ապահովել փաստաբանների կողմից ՀՀ օրենսդրության և փաստաբանական էթիկայի նորմերի պահպանումը փաստաբանների նկատմամբ կարգապահական վարույթի իրականացման և կարգապահական պատասխանատվության ենթարկելու միջոցով: Իսկ ընտրված միջոցի համապատասխանությունը բխում է ընտրված կարգապահական տույժը նշանակելիս և Օրենքի 39.10 հոդվածի 2-րդ մասով նախատեսված պատասխանատվության անհատականացման չափանիշները կիրառելիս Պատասխանողի վարքագծի ծանրության, մեղքի աստիճանի և Պատասխանողի անձը բնութագրող հատկանիշների քննությունից:

Մեղքի աստիճանը

Տվյալ պարագայում, Հանձնաժողովը հաշվի է առնում այն փաստը, որ գործի նյութերով հաստատված է համարվում, որ Փաստաբանը գիտեր այն հանգամանքի մասին, որ թիվ ԵԴ2/2193/02/25 քաղաքացիական գործով պատասխանող՝ Ծաղիկ Գրիգորյանի շահերը ներկայացնում է Դիմող՝ փաստաբան Արմինե Հովհաննիսյանը, որպիսի պայմաններում Փաստաբանի կողմից նախաձեռնվող ցանկացած շփում վերջինս կարող էր և պարտավոր էր կազմակերպել միայն Դիմողի համաձայնությամբ:

Փաստաբանի անձը, կարգապահական վարույթները, առկա տույժերը

Հանձնաժողովը հաշվի է առնում Փաստաբանի անձը բնութագրող հանգամանքները, այդ թվում նաև՝ Փաստաբանի մոտ չմարված 2 կարգապահական տույժերի առկայության փաստը, ինչից ելնելով նրա նկատմամբ որպես հիմնական կարգապահական տույժ կիրառում է «խիստ նկատողություն», ինչպես նաև որպես լրացուցիչ կարգապահական տույժ՝ «լրացուցիչ վերապատրաստման դասընթացներին մասնակցել» տույժի տեսակները:

Հաշվի առնելով վերոգրյալը և ղեկավարվելով Օրենքի 11.1-րդ հոդվածի 3-րդ մասի, 39-րդ հոդվածի 1-ին մասի, 39.7-րդ հոդվածի 5-րդ մասի 1-ին կետի, 8-րդ մասի, 39.10-րդ հոդվածի 1-ին մասի 2-րդ և 3-րդ կետերի, 2-րդ և 3-րդ մասերի պահանջներով, Հանձնաժողովը՝

Ո Ր Ո Շ Ե Ց՝

1. Փաստաբան Լիդա Գագիկի Հակոբյանի (արտոնագիր թիվ 1038) նկատմամբ կիրառել կարգապահական տույժ՝ «խիստ նկատողություն», ինչպես նաև լրացուցիչ տույժ՝ «պարտադիր վերապատրաստման դասընթացներին




մասնակցություն»՝ 12 ակադեմիական ժամ ժամաքանակով՝ «Դեոնթոլոգիա» թեմայով՝ «Փաստաբանության մասին» օրենքի 19-րդ հոդվածի 1-ին մասի 2-րդ կետի, ինչպես նաև Կանոնագրքի 5.3 կետի խախտման համար:

2. Հանձնարարել Հանձնաժողովի նիստերի քարտուղարին՝ սույն որոշման մասին իրազեկել կողմերին:

Ծանոթություն. Սույն որոշումը կարող է բողոքարկվել ՀՀ փաստաբանների պալատի խորհուրդ կամ դատական կարգով այն ստանալու օրվանից մեկամսյա ժամկետում: Սույն որոշումն ուժի մեջ է մտնում այն Փաստաբանի կողմից ստանալու հաջորդ օրվանից:

ՀՀ փաստաբանների պալատի
կարգապահական հանձնաժողովի
նախագահ՝

Թիվ ԿԳ-25071-2-Ա
27 օգոստոսի 2025թ.
ք.Երևան



Տաթևիկ Շալջյան